

日還償當以米麥云則必無不許之理我國貧乏之狀使都督知之亦無所妨
事係悶迫出此不得已之計請議大臣處之大臣皆以為便上許之○錄勲
都監請改撰功臣柳孝傑文晦等教書從之時錄勲多難流年少名士撰出
教書者頗有譏嘲之詞故有是請○以權盡已為黃海監司盡已性本迂拙別
無方面才局而持身清約不喜交游人以此許之鄭廣敬為掌隸院判決事崔
覲為大司成俞伯魯為議政府舍人李馨遠為弼善李如璜尹墀為副修撰○
夜良方異方坤方有氣如火光○忠清道忠州洪州保寧黃澗等地癘疫大熾
人民死者各七十餘人令本道監司送醫藥以救○甲寅上朝講益子于資
政殿大司諫李顯英曰人君權柄爵賞而已自上反正之初懲於廢朝頗慎
惜爵賞不幸迨變之後扈從加資厥數甚多陞秩之類不可勝計又有振武錄
勲而濫觴已極況既錄之後或稱先登或稱力戰或稱有勞紛紜追錄錄之又
錄至於未參勲籍者則授以加資大槩以功罪相準則元勲亦無功況其部曲
乎非但此也臣等頃日所論慶德宮基主還授加資及都監監造官六品遷轉
之事莫非官方雜亂之患至於公主第宅之踰制則係干僭越臣等初不欲停
啓慮涉煩擾今姑停論矣既往不可追來者宜可戒上曰此後則當留念焉